



DEO OPTIMO MAX. UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICO-CHIRURGICA,*

QUOD LIBETARIIS DISPUTATIONIBUS
manè discutienda, in Scholis Medicorum, die Jovis quartâ
mensis Martii, anno Domini M. DCC. LVI.

M. LUDOVICO - ANNA LAVIROTTE;
Censore Regio, Doctore Medico, Præsîde.

An pregnantî Apoplexiâ correptæ Partus manu promovendus?

I.



Æ dolenda prorsùs atque infelix sceminarum conditio! Quot & quantis undique calamitatibus circumcluduntur? Illas non modo viris communes morbi, sed & ducenti peculiare la-
cessunt. Siccinè generis humani parentes habentur? Siccinè Natura æquo jure sua disperitur munera? Factum iniquè cla-
mîtent omnes. Scruteris, amabo diversa vitæ mulierum tem-
pora: singula malorum pullities. Molestias, angores, fastidia, curas, sol-
licitudines, querimonias, tædia, dolores, cruciatus ubique animadvertere
est. Crescit & firmescit tenellum corpus? Crescunt, augescunt & incom-
moda. Adventantem pubescendi ætatem expectat horrenda Symptomatum
Syndrome. Debito jam potitur corpus augmento? Menses tentant molimi-
na. Hinc lassitudines, cephalalgia, torpores, cardialgia, nausea, vomitus,
dyspnœa, viscerum tensiones, nonnisi sanguinis effluxu fuganda. Nullum
per vias à Natura dicatas cruori patet iter? Innumera statim se produnt
mala. Hysterici invadunt insultus; Sanguis canalibus suis contineri haud
potens, huc & illuc appellit. Modò ad cerebrum raptus, comatosos epi-
lepticosque accersit affectus; modò fractis ventriculi, vel pulmonum va-

* *Auctore M. PETRO ROUSSIN DE MONTABOURG, 1732.*

A

2
tis, affatim evomitur atque expuitur. Nunc inducā Chlorosi marcescit corpus : nunc idem, superveniente ictero, tetrā tingitur flavedine. His obnoxia malis virginum ætas. At tum minima. Quanta secum trahit vita conjugalis incommoda ! *Partheniacorum* morborum finis sæpè liciti complexus : sed ne victoriam cantitent. Dum Charybdim vitant, in Scyllam præcipites ruunt. Virginum Syren matrimonium : sub caducis quæ præmonstrat liliis horrida latent spineta. Concepit mulier ? In mutato fluidorum motu, mutatā solidorum oscillatione, inaudita appetit, perpetuo torquetur vomitu. Progrediente graviditate addunt se comites difficilis & anhelosa respiratio, dolor lumbos & inguina assiduè discrucians. Varicosi oboriuntur in cruribus tumores ; in lotio retinendo vel excernendo labor ingens ; alvus aut intensius stricta, aut dyarrhæa colliquefcit. Tot ac tam diris absentibus symptomatis, nihil prægnanti metuendum putares ? Illis remotis, felicissimum partum deberes ? Cave, ne te malus auferat error, Paucis concessum ad ultimam usque gestationis diem feliciter pervenire ; ipso sæpè in portu naufragium faciunt gravidæ. Imò si acuto morbo corripiatur prægnans, vix sine partu ab eo liberari potest.

I I.

INTER acutos quibus obnoxia prægnantes, Apoplexiam recenseas. Hæc periculosus nihil. Ubi gravidam invadit, vix de matre & foetu quidquam speraveris. Plurima in prægnante prædicunt Apoplexiam omina. Quidam ex aliqua parte, præsertim ex infimo ventre, vapores ad caput efferri videntur, cuncta apparent circumagi ; caput ingenti & subito percutitur dolore ; facies intensè rubescit ; oculi præ turgescentiâ prominent, iidem vertiginosi, caligantes micantibusque scintillis delusi ; invicta in somnum propensio. Apoplexiam præsentem dira indicant symptomata. Ægra jacet immota, triste adstantibus spectaculum ; stupor omnes artus obsidet. Vox strangulatum rugitus æmulatur ; anhelosa stertorosaque respiratio, debilis aliquandò, sæpè interpolatè perficitur. Pulsus respirationis vicibus accuratè respondet ; spuma ex ore effunditur ; marcescunt oculi : sudor frigidus emanat undique. Atrox ille affectus quoscunque aggreditur ; sæpius tamen viros quàm fœminas ; ex his prægnantes facilius obsedit, semelque obsessas ægriùs dimittit. Quot eheu ! novæ prolis spe lætas immisericorditer depopulatur Apoplexia ? Exhorrueris. Quò propiùs ad gestationis terminum accedunt fœminæ, eò magis periclitantur. Quosdam Apoplexiâ percussos sanari contingit ; ex prægnantibus vix unam. Nec mirum : quæ illis prompta profunt auxilia, his ne parùm quidem conferunt ; quin & matrem & fœtum Orco demittunt. Hujus rei causam sollicitus expiscaris ? Babylonios scrutaris numeros ? At define : ratio non occulta. Quemquamne latet gravidarum status ? Nescire nefas. Crescente foetu, crassescendo dilatur uter ; totum pelvis cavum replet ; undequaque cuncta premuntur abdominis viscera. Ipsamet vasa sanguifera veluti strangulata cruoremmittere non possunt. Obrutus uteri mole venarum Iliacarum truncus, & ab ipsis orientes rami sanguinem in se per arterias transfatum nequeunt revehere. Ubique inferioribus in arteriis obices, ubique remora sanguini non superabiles. Nihilominus interea perficitur Chylosis & Hæmatosis. Aufgescens valdè cruoris copia vasa plus æquo distendit, & eò versùs ubi minor pressio resilit atque desertur. Hinc per Carotides & vertebrales Arterias cerebrum impetit, replet, premit, & Apoplexiam inducit. I nunc & vulgaribus armis morbum aggredere : cassa omnia deprehendes.

SOLITA adversùs Apoplexiam remedia sanguinis missio, Emetica, Cathartica, Ptarmica: optima quidem. Quid autem pręgnanti Apoplecticae proderunt? Venam in brachio pertundis, sanguinem copiosius mittis? Nec malè: At hęc ingenti & subitā opus revulsione; cruor ē cerebro citò dimovendus. Ad Saphenę sectionem certior properas? Heu! Quid agis? Tenellis floribus Austrum immittis, Saphenā sectā viam arteriolo sanguini liberiores parās: sed nonne vides hoc ipso fœtum primi? Certissimum. Profliente ē Saphenā sanguine, magna in Aortam inferiorem creatur derivatio; hujus, quęcumque ab Aortā inferiori sobolescent arterię, participes. Ergo & hanc eandem derivationem persentiet uterus, fœtusque utero conclusus nimia sanguinis quantitate suffocabitur. Emetica propinanda jubes? Accipiti gladio feris; oleum addis flammę. Contractis scilicet abdominalibus musculis, concussis, ventriculo, ceterisque visceribus, sanguineus latex novus morbi fomes, in Aortę superiores ramos, vi novā protruditur. Ad Cathartica veluti ad salutis anchoram confugis? Movent ista quidem; at nihil promovent. Valida exhibes Ptarmica? Illis agitata violentius cerebri medulla turbatur; illis vividius conquassati pulmones disrumpuntur; ab illis repetita ictuum series fœtum necat. Quid ergo? An tota salus ægrotantis nullam sperare? An quę luxuriat auxiliis Medicina, hęc manca? Minimè. Prodit quid perdomari difficile? Suas illic opes undique colligit Medicina. Irrita aut dubia Pharmacorum virtus? Non irrita manuum opera. His mutuatis & ritè parentibus noxii quilibet eradicare Medicus non impotens. Nota est in pręgnante Apoplexię causa? Illam efficit nimia sanguinis quantitas, nimiaque uteri à fœtu distensio. Ergo quavis ratione tollenda. Solita respuit auxilia? Ecur ita dubius & anceps hares? Peritas admoveto manus. Quid non boni profert? Manuum operatione potes fœtum ab Orco redimere, matremque mortis unguibus eripere.

I V.

HAUD mora: prostent obstetricantis manus peritę, opus aggrediantur audacter; fatalis urget necessitas. Ergo pręgnans situ convenienti collocetur; humi in strato, vel in lecto, vel in cathedrā idoneā. Si supina in strato, vel in lectulo jaceat, huic crura, obversis ad nates calcibus, flectenda. Lumbis supponenda pulvinaria, in his paulò altiùs elevata coccygis ossa ab inferioribus non repellantur, sicque minùs obstant fœtus exclusioni. Tum ægrotanti hoc modo dispositę, manibus oleo vel recenti butyro inunctis, obstetricans muliebria pertractabit; collectos unā digitos in vaginam immittet cautius, huc & illuc lentè contorquendo. Itā paulatim ad interius orificium devenient obstetricantis digiti. Hoc tunc temporis, jam tantisper hiulcum, sæpè etiam largè patens observatum. At si minùs apertum, immisso primùm uno duntaxat digito, dein altero, post eosdem alternatim diducendo ab invicem, sensim sine sensu, integrè dilatabitur orificium, & ad membranas usque fœtum involvèntes licebit penetrare. Membranę ex tempore rumpendę, ut effluentibus aquis, tūm interna, tūm externa mulieris genitalia mollescant & lubricentur. Intereadum referato interiori uteri orificio, disruptis membranis, manantibus aquis, situs & dispositio fœtus non omittenda. Quas offerat in ostio partes apprimè disquirendum. An prolapsum caput, an pedes diligentius observet obstetricans: ubi caput non deprehenderit, nec pedes senserit; hos nulla cunctatione manu perquirat, ac demùm repertis fœtum extrahere satagat; nec infau-

4

stus successus. Fœtu educto superest placenta ab utero citissime revellenda. Ab ejus expulsionē tota salus matris pendet. Ergo iterum oleo oblinita manus in uterum mittenda; quo factō extremis digitis exunguibz deglubenda placenta. Ex hac ultimā operatione miri sequentur effectus. Reclusis uteri vasis, cruor per eadem vasa quasi per Cataractas urceatim effluit. Quānam certior & tutior via subitæ Revulsioni? Quidquamne simile universa præstat Pharmacia? Quidquamne cæteræ Artis Chirurgicæ Operationes? Perpendas.

V.

UT perfectē curetur morbus, non sufficit integra morbi causæ cognitio; non remedium convenientium debita applicatio: removendum insuper quicquid aut periculi plenum, aut cassos facit medicaminum effectus. Sic se habent acuti in gravidis. Apoplexia prægnantem invadit? Quis succurres? Vidisti: Medicamenta aut periculosa aut nullius virtutis; ægram non levant; fœtum necare possunt, Ergo tutius quid eligendum. Tutior sanè partus promotio. Illo mediante matri & fœtui magna cedunt commoda. Excussis aquis, educto fœtu, extractâ placenta contrahitur uterus, vasa ejus sanguine turgida vacuantur, tollitur totius abdominis pressio: liberior per inferiora vasa fit sanguinis circuitus. Unde & sanguini nimia copiâ ad cerebrum protruso facilis conceditur retrocedendi locus. Sic minuitur in hoc viscere nervorum pressio. Præterea promovendo partum aliud boni sequitur. Quæ prius inutilia, aut noxia fuissent remedia, jam maximè proficua. Jam sanguis è brachio, è pede sine discrimine mittitur; jam Catharticis, Emeticis moveri viscera non periculum. Plura postulas? Unum addam; nec levis momenti. Gravidam, inquit Hippocrates, acuto morbo corripi lethale. Occumbit prægnans? Perit & fœtus. At heu! in æternum perit. Quāto satius eum partu educere & sacris fontibus ablutum salvare?

Ergo prægnanti Apoplexiâ correpte Partus manu promovendus.

DOMINI DOCTORES DISPUTATURI.

M. Jacobus Barbeau du Bourg, Regia Scientiarum Academia Stokolmiensis Socius.

M. Anna-Carolus Lorry.

M. Franciscus Pousse, Eques.

M. Joannes-Jacobus Mesfence,

M. Bernardus-Nicolaus Bertrand.

M. Camillus Falconet, Salubris Consilii Regii Socius & è Regiâ Numismatum Academiâ.

M. Carolus - Franciscus Theroulde de Toulouse de Vallon, Eques.

M. Stephanus-Ludovicus Geoffroy, Scholarum Professor designatus.

M. Hyacinthus-Theodorus Baron, Amicus Facultatis Decanus.

Proponebat Parisiis PETRUS-JOSEPHUS MORISOT DES LANDES
Catalaunensis, Saluberrimæ Facultatis Medicinæ Parisiensis Baccalaureus,
A. R. S. H. 1756, A SEXTA AD MERIDIEM.

Typis Vidæz QUILLAU, Universitatis & Facultatis Medicinæ Typographi, 1756.